

# Soek jy 'n fantastiese tutor?

[www.teachme2.com/matriek](http://www.teachme2.com/matriek)





# basic education

Department:  
Basic Education  
**REPUBLIC OF SOUTH AFRICA**

## NATIONAL SENIOR CERTIFICATE

**IBANGA 12**

**ISIXHOSA ULWIMI LOKUQALA OLONGEZELELWEYO (FAL)**

**IPHEPHA LESIBINI (P2)**

**NOVEMBA 2021**

**AMANQAKU: 70**

**IXESHA: 2½ liyure**

**Olu viwo lunamaphepha angama-32.**

**IMIYALELO NENGCACISO**

1. Funda le miyalelo ngenyameko phambi kokuba uqalise ukuphendula imibuzo.
2. MUSA ukuzama ukufunda lonke iphepha lemibuzo. Yiya kwiphepha lesiqulatho elilandelayo uze uphawule amanani emibuzo esetwe kwiincwadi ozifundileyo kulo nyaka. Emva koko, funda le mibuzo uze ukhethe leyo ufuna ukuyiphendula.
3. Eli phepha linamaCANDELO amaNE:
 

ICANDELO A: Inoveli	(35)
ICANDELO B: Idrama	(35)
ICANDELO C: Amabali amafutshane	(35)
ICANDELO D: Isihobe	(35)
4. Phendula imibuzo emiBINI kumacandelo amaBINI, ngolu hlobo:
 

ICANDELO A: INOVELI  
Phendula umbuzo kwinoveli oyifundileyo.

ICANDELO B: IDRAMA  
Phendula umbuzo kwidrama oyifundileyo.

ICANDELO C: AMABALI AMAFUTSHANE  
Phendula imibuzo esetwe kumabali amafutshane omaBINI.

ICANDELO D: IMIBONGO  
Phendula imibuzo esetwe kwimibongo yomiBINI.
5. Sebenzisa itshekhlisti ukuzincedisa.
6. Landela imiyalelo esekuqaleni KWECANDELO NGALINYE ngononophelo.
7. Nombola iimpendulo zakho kanye ngokwendlela ekunonjolwe ngayo kwiphepha lemibuzo.
8. Qala ICANDELO NGALINYE kwiphepha ELITSHA.
9. Sebenzisa imizuzu engama-75 KWICANDELO NGALINYE.
10. Bhala ngokucecekeleyo nangokucacileyo.

**IPHEPHA LESIQULATHO**

Eli phepha liza kukunceda ukwazi ukukhetha imibuzo ofuna ukuyiphendula ngaphandle kokufunda lonke iphepha.

**ICANDELO A: INOVELI**

**Phendula NAWUPHI umbuzo OMNYE okwinoveli oyifundileyo.**

<b>INANI LOMBUZO</b>	<b>AMANQAKU</b>	<b>IPHEPHA</b>
1. <i>Kusa Kusihlwa</i>	35	5
2. <i>Umqol' uphandle</i>	35	9
3. <i>UMonwabisi</i>	35	13

**ICANDELO B: IDRAMA**

**Phendula NAWUPHI umbuzo OMNYE okwidrama oyifundileyo.**

4. <i>Ndiyekeni</i>	35	17
5. <i>Inzala YamaRhamba</i>	35	21

**ICANDELO C: AMABALI AMAFUTSHANE**

**Phendula YOMIBINI imibuzo esetwe kumabali amafutshane.**

6.1 'Izibhovubhovu zaseBhayi'	18	25
6.2 'Kanti andizenzanga'	17	27

**ICANDELO D: ISIHOBE**

**Phendula YOMIBINI imibuzo esetwe kwimibongo.**

7.1 'Intambanane'	18	29
7.2 'Ingcwaba'	17	32

**ITSHEKHLISTI**

**QAPHELA:** Phendula imibuzo emibini kumacandelo amaBINI.  
Phawula (✓) amacandelo owakhethileyo.

ICANDELO	IINOMBOLO ZEMIBUZO	INANI LEMIBUZO EPHENDU- LWAYO	PHAWULA (✓)
A: Inoveli  (Kusa Kusihlwa) (Umqol' uphandle) (UMonwabisi)	1–3	1	
B: Idrama  (Ndiyekeni) (Inzala YamaRhamba)	4–5	1	
C: Amabali amafutshane  (Izibhovubhovu zaseBhayi) (Kanti andizenzanga')	6.1 + 6.2	1	
D: Isihobe  (Intambanane) (Ingcwaba')	7.1 + 7.2	1	

**QAPHELA:** Qinisekisa ukuba uphendule imibuzo kumaCandelo amaBINI kuphela.

**ICANDELO A: INOVELI**

Kweli candelo, kukho imibuzo esetwe kwezi noveli zilandelayo:

- *Kusa Kusihlwa* nguKS Bongela
- *Umqol' uphandle* nguMAP Ngani
- *UMonwabisi* nguZA Japhta

Phendula YONKE imibuzo ekwinoveli oyifundileyo.

**UMBUZO 1: KUSA KUSIHLWA – KS Bongela**

Funda ezi zicatshulwa zilandelayo zithatyathwe kule noveli uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zoziBINi izicatshulwa, oko kukuthi UMBUZO 1.1 noMBUZO 1.2.

1.1 Funda esi sicutshulwa silandelayo uze uphendule imibuzo.

**ISICATSHULWA A**

Kukhe kwabhidwana ngale nto indoda ikhala ngento yokuba noko le nto yinkcitho kuba ivenkile ibingekafiki kumgangatho wokuba kungaqeshwa abantu ababini abenza umsebenzi omnye phezu kwaba sebekho. Umfazi uphendule ngelithi ivenkile ibimoyisile uLungile yamgulisa ngenxa yokuba kusithiwa umsebenzi abe ewenza ubumninzi xa eyedwa. Ke ingaba isikhalo sesani xa ephunyuzwa? 'Yiyekele kuthi indaba yevenkile, **wena uye kusebenza le inshorensi yakho ikuhambisa ngamarhatya ikulalise apho uthanda khona.** Ngapha koko ukuba ukhathazwa bubukho bukadadobawo, musa ukuzixhalisa kuba ndiza kumbhatala kweyam imali. Andilohlwempu olo hlobo noko,' iquphe yatsho le mazi. 5 10

Imxhelile le mpendulo uLungile kodwa wazimisela ukuthula. Ukuba ivenkile le ibiza kunikelwa kuYolisa noThamsanqa kuphela, eneneni izinto mhlawumbi beziya kuba ngcono, ngakumbi ukuba iZizikazi eli beliza kuphuma mpela apho kuyo lifike ngokuqwalasela le nale, licebise apha naphaya.

Bathi bakungena aba babini, kwatsho kwavakala ukuba kukho abanye abantu ngoku kuba latsho iqela labathengi lenyuka. Kaloku abantu babetsalwa yimbeko kaThamsanqa noYolisa. Nabo ngeba babevana xa bekunye kuba babehloniphene benomdla ofanayo wokuba ivenkile kaLungile inyuke. 15

1.1.1 Xela le nto bakhe babhidana ngayo uLungile noNomakhwezi ngokwakwesi sicutshulwa. (1)

1.1.2 Kutheni esithi uNomakhwezi uLungile ulala apho athanda khona? (2)

- 1.1.3 Chaza indlela awabuphelisa ngayo uNozililo ubudlelwane bukaNomakhwezi nabaxhasi bevenkile yakwaNtsibande. (2)
- 1.1.4 Xela umfanekiso-ngqondweni oziswa ligama elibhalwe ngqindilili kule nkcaza ingezantsi.  
'Imxhelile le mpendulo uLungile ...' (1)
- 1.1.5 Ikwenza uzive njani ngoLungile intetho kaNomakhwezi ebhalwe ngqindilili kwisicatshulwa? Xhasa impendulo yakho. (2)
- 1.1.6 (a) Ngqina ukuba umxholwana ovelayo kwesi sicutshulwa ngowokungavisisani kwabantu abatshatileyo. (2)  
(b) Kubenasiphumo sini ukungavisisani kukaLungile noNomakhwezi kweli bali? (1)
- 1.1.7 (a) Xela eyona nto ayifuna ngamandla umlinganiswa onguMpumelelo kweli bali. (1)  
(b) Wenze ntoni uNozililo ukuzama ukuba uMpumelelo angayifumani lula le nto uyixele ku-(a)? (2)
- 1.1.8 Gqibezela esi sivakalisi silandelayo ngokukhetha impendulo echanekileyo kwizibiyeli.  
Kwinkcaza ekrwelelwe umgca ngaphantsi kwisicatshulwa isimo sikaThamsanqa noYolisa sichazwa ngendlela ...  
(a) (efihlakeleyo/engafihlakalanga). (1)  
(b) Xela olu didi lozobo lusetyenzisiweyo ukubachaza. (1)
- 1.1.9 Thelekisa izinga lempumelelo yevenkile yakwaNtsibande ngokwakwisicatshulwa nezinga lempumelelo yayo ekupheleni kwebali. (2)

**KUNYE**

## 1.2 Funda esi sicutshulwa silandelayo uze uphendule imibuzo.

**ISICATSHULWA B**

Ngesi senzo, uMpumelelo namhlanje ube ngugqirha wodumo kuba ilizwe liphela lilazile ilinge lakhe athe walenza kwezonyango. Abachola-choli bamaphepha-ndaba naboomabona-kude abasuka kwezinye iindawo baye bacinga ngokuya eLusikisiki. Banika ingxelo etsho lonke ilizwe lalazi ilinge lalo mfana. Abangamaziyo batsho bamhlonipha. Naxa <u>olu dumo lumzisele ukwaziwa nokuthenjwa</u> , kube kwanjalo nasemsebenzini. Babebaninzi kakhulu abantu abasuka kwezinye iindawo nakwamanye amazwe anjengomaLusuthu, Botswana, Swazini njalo njalo beze kufuna unyango kwezi zifo zinxulumene nengqondo.	5
URhulumente waseTranskei encediswa ngowoMzantsi Afrika wenze igalelo elikhulu ukwandisa amasebe esi sibhedlele ngokwesicelo sikaMpumelelo oyena gqirha wayebekwe ukuba abe ngumongameli wesibhedlele. Yena uMpumelelo umenywe kwiindawo ngeendawo ukuba aze kunceda abanye oogqirha kwezinye iindawo mayela nonyango lwengqondo. Kuthe emva kweminyaka emibini sakhiwe esi sibhedlele, kwenziwa umvulo waso.	10 15
linginginya zabantu ezazilapho zazingabaleki. Zazikho izinxiba-mxhaka zelizwe lemidaka; oogqirha, amagqwetha, iititshala, abefundisi, abaphathiswa, izifundiswa, nomgwenye obomvu ndawo-nye nabantwana. Izithethi ngezithethi zathetha akwamila ngca. INkulumbuso yaseTranskei yalebela kumazwi ayo ngokuthi: 'Mfo kaNtsibande, eli linge uthe walenza kude kuze kuma kweli nqanaba kukulo, lelincomekayo neliya kuhlala lihleli ezimbalini zabantu baseTranskei bedibene noRhulumente wabo.	20

- 1.2.1 Xela esi senzo asenzileyo uMpumelelo simenze wafumana udumo ngokwakwicutshulwa. (2)
- 1.2.2 Kwakutheni ukuze uMpumelelo akhethe ukuya kusebenza eLusikisiki? (2)
- 1.2.3 Isixelela ntoni ngoMpumelelo inkcaza ekrwelelwe umgca ngaphantsi kwicutshulwa? (2)
- 1.2.4 Ngqina ukuba uLungile ungunobangela wokuphumelela kukaMpumelelo kwezemfundo. (2)
- 1.2.5 Kwezi ziganeko zilandelayo chonga zibeZIBINI eziqhubeka kwinqanaba lokuyondelana/lokujiya kwebali. (2)
- A UNomakhwezi utyoboza imoto yomsebenzi kaLungile.  
 B ULungile uthenga iivenkile kuMosiya.  
 C Kwenziwa umvulo wesibhedlele esandiswe ngoncedo lukaMpumelelo.  
 D UNTongana uya kufuna iincwadi zevenkile kuThamsanqa.



- 1.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo ibeluncedo njani ekuphumeleleni kweminqweno kaMpumelelo kwezonyango? (2)
- 1.2.7 Ngubani umlinganiswa esingqamene naye isihloko sale noveli? (1)
- 1.2.8 Kudluliswa myalezo mni ngoku kuqhubeka kwisicutshulwa? Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa kwisicutshulwa. (1)
- (b) Xhasa mpendulo oyinike ku-(a). (2)
- [35]**

**UMBUZO 2: UMQOL'UPHANDLE – MAP Ngani**

Funda ezi zicatshulwa zilandelayo zithatyathwe kule noveli uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zoziBINI izicatshulwa, oko kukuthi UMBUZO 2.1 noMBUZO 2.2.

2.1 Funda esi sicutshulwa silandelayo uze uphendule imibuzo.

**ISICATSHULWA C**

'Ndiyakuva mna,' uvakale esitsho ngelinyanisileyo uHlobo, emangalisiwe ukuphawula ukuba umntu abecinga ukuba uphungulekile kanti uvuthelwe ngaphakathi. 'Uyandiva?' Inggqinisisile le ntokazi seyitsho ngoncumo, iqala njalo ukubonakalisa ubuso obuhle okoko ifikile. 'Ndiyakuva mna, ndingelolitye nje.' 'Uzuqalele apho ke ukusebenza ukuba undiva ngokwenene.' 5

'Ndithi ndiyakuva mna,' yaphinda yatsho le nto yakwaHlobo. 'Ndingavuya undiva kakuhle,' yenze eso sithukuthezi le ntokazi. Ukhe wee nqumama uHlobo, wandula wabeka lo mbuzo: 'Khawume kodwa ke ... Ucinga ukuba wayejonge phi ke lo Linda ngokwenza ayenzileyo-mandithi ukuba nguyeye ke?' 10

'Kaloku sesenza nje ngoku eqhutywa ngumona ozalwa kukuqonda ukuba izinto zikaEddie awayecinga ukuba zoba zezabo bodwa, sezinomngeneleli abengamazi. Akubazi na wena abafazi?' 15

'Ndiyakuva mna,' utsho ngeliphantsi okaHlobo. 'Ndingavuya undiva kakuhle.' 'Akukho iyenye ke ovuka nayo, sis' omkhulu?' Uphinde wancela uHlobo kulo mbele. 'Ngathi ndisaphelele apho. Ezintsha ndomana ukuza kukuvisa ngazo.' 20

**'Nangamso ke qobokazana ...'** Utsho ndahlutha. 'Endingakuthembisa ngayo yeyokuba yonke into othe wandixhobisa ngayo iya kundinceda kakhulu ekulandeni lowo ungumenzi wobubi – ukuba ukho ke.'

Uthe ebuyela eofisini yakhe okaHlobo, wafika unobhala wakhe seelangazelela ukuva ezintsha.

'Akukabikho ntw' ibitheni, Lizzie,' uphosise watsho omaqhinga akubuzwa ngendima aseenzile kuphando lwakhe.

- 2.1.1 Xela le nto uHlobo abuzwa ukuba uLinda wayejonge phi ngokuyenza ngokwakwesi sicutshulwa. (1)
- 2.1.2 Kutheni uHlobo emangalisiwe kukuthi kanti le ntokazi athetha nayo ivuthelwe ngaphakathi? (2)
- 2.1.3 Chaza indlela abadibene ngayo kwesi sikhululo samapolisa uHlobo nale ntokazi athetha nayo. (2)
- 2.1.4 Xela umfanekiso-ngqondweni oziswa ligama elibhalwe ngqindilili kwinkcaza engezantsi. (1)
- 'Ndiyakuva mna,' utsho **ngeliphantsi** okaHlobo.

- 2.1.5 Kukwenza uzive njani ngoHlobo ukumamela kwakhe ngomonde lo Nkskz. Hobe athetha naye kwisicatshulwa? Xhasa impendulo yakho. (2)
- 2.1.6 (a) Ngqina ukuba umxholwana ovelayo kwesi sicutshulwa ngowenkohliso. (2)
- (b) Ibenasiphumo sini le nkohliso kweli bali? (1)
- 2.1.7 (a) Xela eyona nto ayifuna ngamandla umlinganiswa onguHlobo kweli bali. (1)
- (b) Enze ntoni amalungu ase*Moonglow* ukuzama ukuba uHlobo angayifumani le nto uyixele ku-(a)? (2)
- 2.1.8 Gqibezela esi sivakalisi silandelayo ngokukhetha impendulo echanekileyo kwizibiyeli.
- Kwinkcaza ekrwelelwe umgca ngaphantsi kwisicatshulwa isimo sikaHlobo sichazwa ngendlela ...
- (a) (efihlakeleyo/engafihlakelanga). (1)
- (b) Xela olu didi lozobo lusetyenzisiweyo ukumchaza. (1)
- 2.1.9 Thelekisa isizathu sokuza kwale ntokazi kwesi sikhululo samapolisa ngokwakwisicatshulwa nesokuza kwayo ekupheleni kwebali. (2)

### KUNYE

## 2.2 Funda esi sicutshulwa silandelayo uze uphendule imibuzo.

**ISICATSHULWA D**

'Dick,' utshilo uMhle emva kokuphendlaphendla naye: 'Ndisabhalele kuKomani, ndibiza lo nkosk. Hobe uxelelwe ngaye ngunolali koko andikafumani mpendulo. Kunjalo nje kufuneka ndithumele enye incwadi ebakhumbuza ngalo mcimbi. 'Mhlekezi, uyazi nawe ukuba ndigunyaziswe ukuba ndiphande ngokufa kukaEddie; akukutsho ngoko ukuba ndingena 5 emicimbini ekude nam.'

'Nakancinci, Dick; ndiqonda kakuhle.'

'Nantsi into endinga ndingayiqonda: Akungebi unalo uluhlu lwempahla elilungelo likamfi?'

'Kaloku into yokuqala esiyenzayo xa sisonga ilifa lomntu oswelekileyo 10 kukucwangcisa izinto ezililungelo lakhe. Enye yezinto esimfunela zona uNorah Hobe kukuba asixelele ngezinye izinto angaba uyazazi engaba thina mhlawumbi siziphosile. Sesiyaifumene inkcukacha efumanekayo, enjengeemali ezisezi bhankini nakweminye imizi yocino lwemali.'

'Awungendibonisi?' 15

'Ukuba uyifunela uphando lwakho; ungayifumana.'

'Andinazimbi iinjongo mhlekazi.'

'Ndiza kukunika incwadi le uzibonele ngokwakho kuba zininzi, mfondini, zaye zivela kwiindawo ngeendawo,' watsho emnika umqulu lowo weencwadi ukuba azifunde. UHlobo ubethe nje phezulu kwinkcukacha yemali; 20 wayengayinaze nganto kakade. Eyona wayefuna ukuyiqonda yimpahla eyiyenye kamfi. Ufikelele kwindawo echaza izinto eziselugcinweni lweAll-Safe Bank kwisebe layo elilapho eMonti.

- 2.2.1 Xela lo mcimbi kuthethwa ngawo kwesi sicutshulwa. (2)
- 2.2.2 Kwakutheni ukuze uHlobo athunyelwe kule ofisi kaMhlekezi? (2)
- 2.2.3 Lisixelela ntoni ngoHlobo igama elikrwelelwe umgca ngaphantsi kwisicutshulwa? (2)
- 2.2.4 Ngqina ukuba uEddie ungunobangela wokuphumelela kukaHlobo ekubambeni abenzi bobubi. (2)
- 2.2.5 Kwezi ziganeko zilandelayo chonga zibeZIBINI eziqhubeka kwinqanaba lokuyondelana/lokujiya kwebali. (2)
- A UHlobo ukhubeka awe e*Moonglow* avele ukuba ungumcuphi.
- B ULinda utsalela uEddie umnxeba esithi akaphumeleli ukuya ebhayaskophu.
- C Amalungu e*Moonglow* abanjelwa ukubulala uEddie noLulama.
- D ULinda uvalelwa esiseleni ngesityholo sokubulala uEddie noLulama.

- 2.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo ibeluncedo njani ekuphumeleleni komnqweno kaHlobo wokufumana ababulali bakaEddie noLulama? (2)
- 2.2.7 Ngoobani abalinganiswa esingqamene nabo isihloko sale noveli? (1)
- 2.2.8 Kudluliswa myalezo mni ngoku kuqhubeka kwisicutshulwa? Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa sisicutshulwa. (1)
- (b) Xhasa mpendulo oyinike ku-(a). (2)
- [35]**

**UMBUZO 3: UMONWABISI – ZA Japhta**

Funda ezi zicatshulwa zilandelayo zithatyathwe kule noveli uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zoziBINi izicatshulwa, oko kukuthi UMBUZO 3.1 noMBUZO 3.2.

3.1 Funda esi sicutshulwa silandelayo uze uphendule imibuzo.

**ISICATSHULWA E**

Wawungababona abasebenzi bakhe beququzela phakathi kwezo zihlwele behambisa iziphungo kuloo maxhego namaxhegokazi atsha lilanga elinde ukufika kwemoto kaRhulumente. Maxa wambi uThandabantu wayebakhela intente ukuze ibakhusele elangeni, emvuleni okanye engqeleni.

Abantu abaninzi ingakumbi abanye oosomashishini babemangaliswa yimpumelelo yakhe kwezoshishino, bambi bade bamtyhole ngokuthwala. Babephikisana ngendlela awaqala ngayo, kunye nendlela awayesenza ngayo ukuze loo venkile yakhe itsale nabakude lee kuyo. Babemangaliswa nayile nkciho yakhe ingaka esenzela ububele ezo zihlwele zazize kuthenga kwakhe. Yiyo loo nto babemtyhola ngokuluthwalela ushishino. Le nto yokuthwala kwakhe uThandabantu yomelezwa yinkqayi awayesoloko enayo, kwaye evunywe nakukulima kuloo masimi makhulu ayehamba nezo venkile zazishiywe ngabamhlophe. Kuloo venkile yakhe kwakuthengiswa iitapile, iimbotyi kunye nezinye iintlobo zemifuno zonke zivunwe apho kwakhe.

Into yokusoloko echebe inkqayi yakhe yafuna ukumbalekisa ngabathengi, iintshaba zakhe ziyenza into enkulu loo nto. Babemtyhola ngokutsiba, besithi ukhe abonwe ebusuku ehamba phakathi kwaloo masimi akhe ayechume kunene, eze. Bafuna ukuqiniseka, babone nokuxhela kwakhe qho ngeempela-veki exhelela abo basebenzi kunye nabathengi kwakhe, besithi yinyoka yakhe leyo ifuna elo gazi lezo zilwanyana ... Kanti babemsukela nje, kuba elona chiza lakhe yayikukuthanda exabise abo bantu babethenga apho kwakhe.

3.1.1 Xela ezi zihlwele kuthethwa ngazo kwesi sicutshulwa. (1)

3.1.2 Kwakutheni ukuze abanye oosomashishini ibamangalise impumelelo kaThandabantu? (2)

3.1.3 Chaza indlela awayifumana ngayo uThandabantu ivenkile yakhe. (2)

3.1.4 Xela umfanekiso-ngqondweni oziswa libinzana elibhalwe ngqindilili kwinkcaza engezantsi.

'... evunywe nakukulima kuloo **masimi makhulu** ayehamba nezo venkile ...' (1)

- 3.1.5 Kukwenza uzive njani ngoThandabantu oku kutyholwa kwakhe ngokuthwala kuthethwa ngako kwisicatshulwa? Xhasa impendulo yakho. (2)
- 3.1.6 (a) Ngqina ukuba umxholwana ovelayo kwesi sicutshulwa ngowobuntu. (2)
- (b) Bubenasiphumo sini ubuntu bukaThandabantu kweli bali? (1)
- 3.1.7 (a) Xela eyona nto ayifuna ngamandla umlinganiswa onguThandabantu kweli bali. (1)
- (b) Zimthintele njani izityholo uThandabantu ukuba ayifumane le nto uyixele ku(a)? (2)
- 3.1.8 Gqibezela esi sivakalisi silandelayo ngokukhetha impendulo echanekileyo kwizibiyeli.
- Kwinkcaza ekrwelelwe umgca ngaphantsi kwisicatshulwa isimo sikaThandabantu sichazwa ngendlela ...
- (a) (efihlakeleyo/engafihlakalanga). (1)
- (b) Xela olu didi lozobo lusetyenzisiweyo ukumchaza. (1)
- 3.1.9 Thelekisa impumelelo yamashishini kaThandabantu ngokwakwisicatshulwa nempumelelo yawo ekupheleni kwebali. (2)

### KUNYE

## 3.2 Funda esi sicutshulwa silandelayo uze uphendule imibuzo.

**ISICATSHULWA F**

Yonke le mibuzo nothotho lweminye yazalisa loo ngqondo yakhe sele emana ukuziva ethetha yedwa. Wazinqanda sele emana ehamba-hamba apho endlwini. Wazixolisa ngokuthi yonke loo nto yehlileyo ibidalwe isekwe Ngophezulu, kuba uthe xa acinga indlela awayezama ngayo ukuba abo bantwana bakhe bazilumkele izinto ezinjalo, ebanika ukuzingca nokuzixabisa ukuze bakwazi ukuziphepha izihendo ezinjalo, waqonda ukuba noko ityala alinako ukubekwa kuye ngokupheleleyo. Kodwa wathi akuzama ukukhumbula nokuba kukanye apho wakha wahlala phantsi namantombazana la awacebise ewaxelela ngokukhula kwawo nangobudlelwane bawo nabantu abangamadoda ukuze bazokungena kwizinto ezinjalo sele belunyukisiwe, waxhitshulwa sisazela kuba akakhumbulanga nolu lunye usuku ekwenza oko. Koko yena wayegxininise kwimbonakalo yabo apho phakathi kwabo bantu bahleli nabo. Into yokuba loo mantombazana akhe ayekhula ngoko ke ayeza kudibana nezinto zokuthandana yamsithela yena nje esababona njengabantwana. Wakhumbula into yokuba kanene nokuba bayasela wayiqaphela emva kwethuba elide kakhulu, kwaye akenzanga nto ukuzama ukuba bohlukane nalo mkhwa koko uzame ukuba ufihlwe nakumyeni wakhe lowo. Intliziyo yakhe yopha ngakumbi xa ezo ngcinga zivela kuye.

- 3.2.1 Xela isenzo esenziwe nguHlubikazi esibangela ukuba uMamTolo afikelwe luthotho lwemibuzo ezalise ingqondo yakhe. (2)
- 3.2.2 Kwakutheni ukuze iintombi zikaMamTolo zingaqhelani nezizalwana zazo eNtshiqo? (2)
- 3.2.3 Isixelela ntoni ngoMamTolo inkcaza ekrwelelwe umgca ngaphantsi kwisicatshulwa? (2)
- 3.2.4 Ngqina ukuba ukungabikho kukaThandabantu phakathi kwekhaya nako kubengunobangela wokunxila kweentombi zakhe. (2)
- 3.2.5 Kwezi ziganeko zilandelayo chonga zibeziBINI eziqhubeka kwinqanaba lokuyondelelana/lokujiya kwebali. (2)
- A UGcinumzi ubhubha kwingozi yebhasi.  
B Kufika isimumu esinguMaRhadebe kwaThandabantu.  
C UThandabantu wenzelwa itheko lokumamkela.  
D UMonwabisi unikwa isikhundla sokulawula amashishini kaThandabantu.
- 3.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo ibeluncedo njani kwimpumelelo kaMonwabisi kwezoshishino? (2)



- 3.2.7 Ngubani umlinganiswa esingqamene naye isihloko sale noveli? (1)
- 3.2.8 Kudluliswa myalezo mni ngoku kuqhubeka kwesi sicutshulwa?  
Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa sisicutshulwa. (1)
- (b) Xhasa mpendulo oyinike ku(a). (2)
- [35]**

**AMANQAKU ECANDELO A: 35**

**ICANDELO B: IDRAMA**

Kweli candelu, kukho imibuzo esetwe kwezi drama zilandelayo:

- *Ndiyekeni* nguDM Jongilanga
- *Inzala YamaRhamba* nguM Mlokoti

Phendula YONKE imibuzo ekwidrama oyifundileyo.

**UMBUZO 4: NDIYEKENI – DM Jongilanga**

Funda ezi zicatshulwa zilandelayo zithatyathwe kule drama uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zozibini izicatshulwa, oko kukuthi UMBUZO 4.1 noMBUZO 4.2

4.1 Funda esi sicutshulwa silandelayo uze uphendule imibuzo.

**ISICATSHULWA G**

MADALA:	Akusekho mntwana ufundiswa tywala kule mihla koko bazifundela kula maxethuka, befundiswa zezasemisingizaneni iititshala. Le ngxaki ayisayi kuze iphele ngaphandle kokuba sibe nazo zonke iindidi zezikolo kwiindawo esihlala kuzo, bayeke abantwana bethu ukushiya amakhaya bebancinane; babuye besiphathele umbayiyana wembabazana. Nangoko ayisayi kuphela kuthi cwaka kodwa iya kuthotha kunoku.	5
JEKWA:	Ingena phi yonke le ntshwaqane? Sihlalo, bamb' iintambo. Masigqibe ngale titshala. Makuvotwe ngoku.	
NTABA:	Mhlalingaphambili, kudala ndiphulaphule nibeth' iintonga. Kucacile kum ukuba isininzi senu asibuboni ubungozi balo mkhwa kwikamva labantwana bethu ngenxa yokuyokozela kwemisebe yabo bubuthongo. Ninga ningasindisa umphefumlo omnye oselukiyakiyeka, kufe amawaka? Nithi masibukele ukudodiswa kwabantwana lihlabe umhlaba? Ndiyayibuka indoda enamandla emsebenzini wayo njengekhwezi lomso; itshabhe kum yakungakwazi ukuzoyisa ebomini apha. Linye ke sihlalo nali – utitshala lo makacelwe arhoxe emsebenzini, singaxhaphisi izandla zethu ngegazi lakhe eliphuma kumanxeba abangwe kukuzikhanda kwakhe ngelitye elibona.	10 15 20
MADALA:	Ithini indlu kule ndawo? Ndiphawula ukuba niwa ngokuwa nixel' iinkonjane namahlabankomo kwimbutho yeembuzane nezintlwa. 'MAKARHOXE NGOKU' atsho amalungu ngaphandle koMavuso.	
MADALA:	Uyeva ke mfo kaNdila ...	
NDILA:	Ndiyabulela nkos'am andinawo amazwi omele emqaleni. Ndiza kuhlangabezana nomnqweno wenu lingatshonanga eli. Enkosi.	25
MADALA:	Masivale. (kuvalwe kugodukwe.)	

- 4.1.1 Xela ukuba bayintoni eNobutho aba bantu baxoxa kule ntlanganiso iqhubeka kwesi sicutshulwa. (1)
- 4.1.2 Kutheni uJekwa esithi intetho kaMadala yintshwaqane? (2)
- 4.1.3 Chaza indlela owafikelela ngayo kuMawonga lo mcimbi kuxoxwa ngawo kule ntlanganiso. (2)
- 4.1.4 Xela umfanekiso-ngqondweni oziswa ligama elibhalwe ngqindilili kwinkcaza engezantsi.  
'... umphefumlo omnye **oselukiyaikiyeka**, kufe amawaka?' (1)
- 4.1.5 Ikwenza uzive njani ngoNdila le ngxoxo iqhubeka kwesi sicutshulwa? Xhasa impendulo yakho. (2)
- 4.1.6 (a) Ngqina ukuba umxholwana ovelayo kwesi sicutshulwa ngowokuba ukoyiswa kukuziphatha kukhokelela kwisiwo. (2)  
(b) Kubenasiphumo sini ukoyiswa kukuziphatha kukaNdila kweli bali? (1)
- 4.1.7 (a) Xela eyona nto ayifuna ngamandla umlinganiswa onguMawonga kweli bali. (1)  
(b) Wenze ntoni uNdila ebangele ukuba uMawonga angayifumani le nto uyixele ku-(a)? (2)
- 4.1.8 Gqibezela esi sivakalisi silandelayo ngokukhetha impendulo echanekileyo kwizibiyeli.  
Kwinkcaza ekrwelelwe umgca ngaphantsi kwisicutshulwa isimo sikaNdila sichazwa ngendlela ...  
(a) (efihlakeleyo/engafihlakelanga). (1)  
(b) Xela olu didi lozobo lusetyenzisiweyo ukumchaza. (1)
- 4.1.9 Thelekisa izimvo zikaMadala kule ntlanganiso iqhubeka kwesi sicutshulwa kunye nezimvo zakhe kwintlanganiso engokunxila kukaMawonga. (2)

**KUNYE**

## 4.2 Funda esi sicutshulwa silandelayo uze uphendule imibuzo.

**ISICATSHULWA H**

MAZIKO:	Lo mcimbi awufuni zingcali namachelezi, uphandle nje. Yiyani nje phaya esikolweni ngomso lo, niya kufika eludaka. Ukuba niya ngoMvulo, olona suku lwakhe, nibize abahloli kwangoMvulo lowo zinganqakra.	
MADALA:	Ingathi lililo elo lakho kunjalo nje alingezi nakuthetha kwathini na.	5
MAZIKO:	Kuyo yonke ke le nto unga akungelibali ukuba indawo le <u>ndiyincwase mpela, ndaye ndizimisele.</u>	
MADALA:	Xa kunjalo ke mfowam yazi ukuba amatwina ayahlutshezwa ukuze abambe.	
MAZIKO:	Cacisa bawo.	10
MADALA:	Kanti andithethi siLungu. Ukuba uyindoda, nandoda indoda yomXhosa umelwe kukundiva. Yintakobusi yodwa ethanda ubusi ingakwazi ukuphakula.	
MAZIKO:	O! Hayi ke ndiyaqal' ukukuva ke ngoku. Ndikuloo nto ukuyo nawe. Ndazi mhlophe ukuba intakobusi ishiyelwa elenkosi inqatha.	15
MADALA:	Uthe kanti uyindoda titshala. Into enje ke mfo wam, ngakumbi eyamadoda ivalelwa macal' onke ibolele ngaphakathi.	
MAZIKO:	Hayi ungafane uxhale. Kaloku ndakha ndalusa andiLawu lantaba. Ubuchule kukubasa isiduli xa usoja ebiweyo.	
MADALA:	Kulungile titshala, ingathi umqa awunakomela luphinini luphethwe ngabazamisi.	20
MAZIKO:	Isichotho sizibika ngemibane kanti ithole likanogumbe alithwalisi mehlo kuba lindululwa ngumrhubhe wenkungu. Unga lo mcimbi unganjalo	

- 4.2.1 Xela lo mcimbi athi uMaziko awufuni zingcali kwesi sicutshulwa. (2)
- 4.2.2 Kutheni uMaziko eze kwaMadala? (2)
- 4.2.3 Isixelela ntoni ngoMaziko inkcaza ekrwelelwe umgca ngaphantsi kwisicutshulwa? (2)
- 4.2.4 Ngqina ukuba uMaziko ungunobangela wokungavani kukaNdila noMawonga. (2)
- 4.2.5 Kwezi ziganeko zilandelayo chonga zibeZIBINI eziqhubeka kwinqanaba lokuyondelana/lokujiya kwebali: (2)
- A UFuneka ugxotha uMawonga endlwini yakhe.
- B UMawonga uxoxisa uNdila ngokuthuma abantwana utywala ngexesha lesikolo.
- C UNdila ugwetywelwa ukuxhonywa.
- D UMawonga ucela uthando kuZanele ethekweni likaFuneka.

- 4.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo ibeluncedo njani ekuphumeleleni komnqweno kaMaziko wokuba yinqununu? (2)
- 4.2.7 Ngubani umlinganiswa esingqamene naye isihloko sale drama? (1)
- 4.2.8 Kudluliswa myalezo mni ngoku kuqhubeka kwesi sicutshulwa? Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa sisicutshulwa. (1)
- (b) Xhasa mpendulo oyinike ku-(a). (2)
- [35]**

**UMBUZO 5: INZALA YAMARHAMBAMBA – M Mlokoti**

Funda ezi zicatshulwa zilandelayo zithatyathwe kule drama uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zoziBINi izicatshulwa, oko kukuthi UMBUZO 5.1 noMBUZO 5.2.

5.1 Funda esi sicutshulwa silandelayo uze uphendule imibuzo.

**ISICATSHULWA I**

NOYONGO:	Oh! Sana lwam sowuvukile?	
DINA:	Ewe Sis' Yongs.	
NOYONGO:	Kulungile sisi, ndiyavuya ukukubona usemandleni. Bekunzima mpela phezolo, ndikubonile ntombi.	
DINA:	Ewe bekunzima nyhani sisi, loo nto ndisenentloko nangoku.	5
NOYONGO:	Ifanele kaloku sisi, yho! Ngokwala meko ubukuyo izolo. Kunjalo ndikuqondile nje ukuba uza kuvuka uneyakhe yambi yona ibhabhalaza inkunzi yayo.	
DINA:	Yho sisi! Uphi ubhutiza?	
NOYONGO:	Ngubani ubhutiza?	10
DINA:	Lo wale ndawo. ( <i>Ehleka eyokozelisa imisebe</i> ).	
NOYONGO:	Hhe hhe bantu! Ayingobhutiza lowa nguMlungu.	
DINA:	Hehehehe! ( <i>Eyoko yoko</i> ). Hayi wethu Sis' Yongs, yintoni umahluko?	
NOYONGO:	Tyhini! Hhe wethu ntombi kusemsebenzini apha. Sonke sisebenzisa indlela enye yokuthetha, sithi Mlungu.	15
DINA:	Hehehe! Sis' Yongs, ndiyakuva.	
NOYONGO:	Jonga sana lwam, unethamsanqa wena ngoba uza kwamkela nje ungasebenzanga kule iveki. Uthe uMlungu awuzokusebenza kule iveki kuba uqala. Kodwa ufuna uziqhelanise nje nomsebenzi.	20
DINA:	( <i>Encumile</i> ) - Kulungile Sis' Yongs.	
NOYONGO:	Uza kuqala wena kule veki izayo. UMLungu uthe masikuphe nje le yona iveki, uziqhelanise nomsebenzi.	
DINA:	Kowu! Unobuntu ke khona. Ndiyabulela Sis' Yongs.	25
NOYONGO:	Kulungile sana lwam. Kodwa kufuneka uvuke ngoku sisi uhlambe ukuze siye ngaphambili kwabanye, ukuze ubone...	
DINA:	Andazi kaloku mna Sis' Yongs, andazi kwanto apha, ndifike kunje.	
NOYONGO:	Yho! Hayi kaloku sana, <u>ndingayintoni nguMlungu</u> . Akufuneki iMini-Bar ibethe umoya ...	30

5.1.1 Xela obu bunzima kuthethwa ngabo kwesi sicutshulwa. (1)

5.1.2 Kutheni uDina eyibona iyinto engeyongxaki eyokuthi bhutiza kuThambolenyoka? (2)

- 5.1.3 Chaza ukuba wangena njani uDina kulo msebenzi wakwaThambolenyoka: (2)
- 5.1.4 Xela umfanekiso-ngqondweni oziswa ligama elikwizibiyeli kule ntetho ingezantsi.  
'... (*Encumile*) - Kulungile Sis' Yongs.' (1)
- 5.1.5 Ikwenza uzive njani ngoNoyongo le ngxoxo iqhubeka kwesi sicutshulwa? Xhasa impendulo yakho. (2)
- 5.1.6 (a) Ngqina ukuba umxholwana ovelayo kwesi sicutshulwa ngowokufakwa kwabantwana kwiziyobisi ngabantu abadala. (2)
- (b) Kubenasiphumo sini ebalini ukungena kukaDina kumgibe weziyobisi? (1)
- 5.1.7 (a) Xela eyona nto ayifuna ngamandla umlinganiswa onguThambolenyoka kweli bali. (1)
- (b) Wenze ntoni uDina ebangele ukuba angayifumani uThambolenyoka le nto uyixele ku-(a)? (2)
- 5.1.8 Gqibezela esi sivakalisi silandelayo ngokukhetha impendulo echanekileyo kwizibiyeli.  
Kwinkcaza ekrwelelwe umgca ngaphantsi kwisicutshulwa isimo sikaThambolenyoka sichazwa ngendlela ...
- (a) (efihlakeleyo/engafihlakelanga). (1)
- (b) Xela olu didi lozobo lusetyenzisiweyo ukumchaza. (1)
- 5.1.9 Thelekisa isimo sikaDina ngokwakwisicutshulwa nesimo sakhe ekupheleni kwebali. (2)

**KUNYE**

5.2 Funda esi sicutshulwa silandelayo uze uphendule imibuzo.

### ISICATSHULWA J

MBHOTOLOSHI:	Hayi uyinkunkqela kamakhwekhwetha womcuphi Sajini Gxalaba. Ndikothulela umnqwazi.	
GXALABA:	Hahaha. <u>Hayi ungancomi mna</u> Sajini. Oyena makhwekhwetha nguye lo uchophe ecaleni kwakho.	
MBHOTOLOSHI:	Uthetha ukuthini?	5
GXALABA:	( <i>Ekhomba ngentloko kuDina</i> ) –Yitsho akubalisele.	
MBHOTOLOSHI:	Kunjalo Sajini?	
DINA:	Nam ndingaba ndiyazigwagwisa ukuba ndingathi licebo lam Sajini. Asilocebo lam licebo likaThixo. Ngoba ukuba bendilande elam icebo, ngeba mhlawumbi ndim ngoku okule ndawo kaThambolenyoka, ndinkolo-nkoloza kwesimnyama isisele.	10
MBHOTOLOSHI:	Cacisa Sajini. Ndiyaphela kukungxama.	
DINA:	Kaloku bendisele ndithenge nesixhobo mna Sajini. Ndiza kumbulala nje nya uThambolenyoka. Kwathi kanti uThixo uyabona, waliphanzisa elo cebo lam, ngokuthi eso sixhobo sam sisuke sibhaqwe ngumkhuluwa wam xa kanye ndiza kusisebenzisa. Wandikhalimela kabukhali ngelithi mandingathatheli umthetho ezandleni zam. Kwathi kanti ngolo hlobo kuza kuvela eli icebo likaThixo.	15 20
MBHOTOLOSHI:	Khawude uvele Sajini. Wenza njani?	
DINA:	Kaloku Sajini emva koko ndeza apha kuSajini Gxalaba kwangaloo mini. Sawuxubusha lo mbandela kangangoko, saphantse sachitha iiyure ezintandathu zonke siwuphethe.	25
MBHOTOLOSHI:	Ndiphulaphule Sajini.	
DINA:	Sagqiba kwelokuba masibabambe sibavalele eziseleni ngabanye-ngabanye, uNozici, Nozigoci noNomhase ngokulandelelana kwabo. Athi ngamnye esimbambileyo samvalela, simchaze eluntwini ngokungathi ugetyengiwe wabulawa.	30

- 5.2.1 Xela esi senzo asenzileyo uSajini Gxalaba ukuze anconywe ngokwakwicutshulwa. (2)
- 5.2.2 Kutheni uMbhotoloshi engayazi ukuba kwenziwe njani ukuze ade abanjwe uThambolenyoka? (2)
- 5.2.3 Isixelela ntoni ngoSajini Gxalaba inkcaza ekrwelelwe umgca ngaphantsi kwicutshulwa? (2)
- 5.2.4 Ngqina ukuba ooNoyongo bangunobangela wokuphumelela kukaNyoka ekuxhaphazeni abantwana. (2)



- 5.2.5 Kwezi ziganeko zingezantsi chonga zibeziBINI eziqhubeka kwinqanaba lokuyondelelana/lokujiya kwebali:
- A OoSdokhwe baleqa uDina ngenjongo yokumbulala.
  - B UDina ufumana iselula kuNoyongo.
  - C UThambolenyoka uyagwetywa.
  - D UDina ugxothwa nguThambolenyoka kuba ekhulelwe. (2)
- 5.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo ibeluncedo njani ekuphumeleleni komnqweno kaDina wokubambisa uThambolenyoka? (2)
- 5.2.7 Ngubani umlinganiswa esingqamene naye isihloko sale drama? (1)
- 5.2.8 Kudluliswa myalezo mni ngoku kuqhubeka kwesi sicutshulwa? Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa sisicutshulwa. (1)
  - (b) Xhasa mpendulo oyinike ku-(a). (2)

[35]

**AMANQAKU ECANDELO B: 35**

**ICANDELO C: AMABALI AMAFUTSHANE**

Kweli candelo, kukho imibuzo esetwe kula mabali mafutshane alandelayo:

- 'Izibhovubhovu Zasebhayi' – LL Ngewu
- 'Kanti Andizenzanga' – EZ Guqa

Phendula YONKE imibuzo ekwibali elifutshane olifundileyo.

**UMBUZO 6**

Funda ezi zicatshulwa zilandelayo zithatyathwe kumabali amaBINI uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuzo zozibini izicatshulwa, oko kukuthi UMBUZO 6.1 noMBUZO 6.2

**'IZIBHOVUBHOVU ZASEBHAYI' – LL Ngewu**

6.1 Funda esi sicutshulwa silandelayo uze uphendule imibuzo.

**ISICATSHULWA K**

Kwalile ngeny'imini ezi zikrelemnqa ziggiba kuqhuba njengesiqhelo emzini wesiqhuza somfo wakwaMaqhazolo, kanti azivumisanga ukuba umninimzi ubesel'ezincamile ethe maxhalanga ndidleni kuba amade ngawetyala. Ziwushiyele umnyango ebezingene ngawo zihamba ngokukhululekileyo ukuya ngasesangweni, zixhakazela zizinto zeli khaya. Zanele nje 5 ukusondela kwelo sango beziza kuphuma kulo, umfo kaMaqhazolo wakhulula irhuluwa kwahlokoma iDike yonke. Ulibethe lavuthuluka iqatha lesikrelemnqa langathi ngamagqabi omthi ubethwe ngamatye esichotho. Ezinye izikrelemnqa zithe zakuqonda ukuba izinto zonakele zaphel'emehlweni zingacelanga nendlela njengesiqhelo. Zilahle kwanto 10 zisindisa nje ubom bazo. Zisishiye esinye isikrelemnqa sixabe endleleni sidliwa ziintlungu zembumbulu eshiye nje ulwamvila yagqitha.

Amadoda angabamelwana athi akuva liduduma izulu lezandla, nakuba lizolile nje, azula ezindlwini exakwe ukuba aza kuzifihla phi na. Wambi azincama, akroba kancinci ngezikroba zezitshixo zeengcango zemizi yazo 15 izibilini ziphezulu. Umfazi uqhube indoda yakhe esithi, 'Yini yise kaNobani uyindoda yokwenzani xa siza kufel' endlwini ukho', iphendule indoda ngelithi, 'Ngubani lo owakuxokisayo wathi ndiyindoda yezibham? Mna ndifundile nje andisosidenge, ngoko ke andinakuya ekufeni ndikubona, kuba abukho obusetyesini mfazi'. 20

6.1.1 Xela esi siqhelo kuthethwa ngaso kwisicatshulwa. (1)

6.1.2 Kwakutheni ukuze izikrelemnqa ziphume ngokukhululekileyo ukuya ngasesangweni? (2)

- 6.1.3 Chaza indlela amadoda aseDikeni ayekubonakalisa ngayo ukuzoyika izibhovubhovu. (2)
- 6.1.4 Xela umfanekiso-ngqondweni oziswa ligama elibhalwe ngqindilili kwinkcaza engezantsi.  
'Ulibethe **lavuthuluka** iqatha ...' (1)
- 6.1.5 Sikwenza uzive njani ngesikrelemnqa isenzo sokudutyulwa kwaso? Xhasa impendulo yakho. (2)
- 6.1.6 (a) Ngqina ukuba umxholwana ovelayo kwesi sicutshulwa ngowokuba umntu omnye ozinikeleyo unakho ukuludala utshintsho. (2)  
(b) Kubenasiphumo sini ebalini oku kuzincama kukaMaqhazolo? (1)
- 6.1.7 (a) Xela eyona nto ifunwa ngamandla zizibhovubhovu zaseBhayi kweli bali. (1)  
(b) Wenze ntoni uMaqhazolo okubangele ukuba izibhovubhovu zingayifumani le nto uyixele ku-(a)? (2)
- 6.1.8 Kwinkcaza ekrwelelwe umgca ngaphantsi kwisicutshulwa isimo samadoda aseDikeni sichazwe ngendlela:  
(a) (efihlakeleyo/engafihlakelanga). (1)  
(b) Xela olu didi lozobo lusetyenzisiweyo ukuwachaza. (1)
- 6.1.9 Thelekisa isimo sesikrelemnqa esidutyulweyo ngokwakwisicutshulwa nesimo saso ekupheleni kwebali. (2)

**KUNYE**

**'KANTI ANDIZENZANGA' – EZ GUQA**

6.2 Funda esi sicutshulwa silandelayo uze uphendule imibuzo.

**ISICATSHULWA L**

UMaDosini ke ubesoloko elungele ukusombulula nasiphina isishiqi unyana wakhe asibona njengento engxamel'ukuxaka intende. Xa kutshawuza imibane, uMntuyedwa ubenethemba lekhusi elingunina. Xa kusiwa amachaphaza andulela isichotho, unkabi ubengaziva evikivekile kuba ubesazi ukuba akanakuba licham kuba unina eyintonga yokumvikela. 5  
Ukhule njalo ke lo mfo ekhulela ekhusini elingunina.

Kwalile xa ineminyaka elishumi elinesithathu le nkewu, kwacaca ukuba kuyo kukho ukungongophala kwezinto ezintama ubukhwenkwe enkwenkweni. Inkwenkwe xa ifikele kweli nqanaba iyaqala ukumana ingqokolisa ilizwi ngokubonakalayo ukuba imi embindini owahlula ubukhwenkwe kubudoda. 10  
Elikarheme ilizwi alaphukanga koko lishiyeke ingathi lilizwi lentombazanana efikisayo. UMaDosini ayimhluphanga nganto imeko yokuqhalela kobukhwenkwe kulo nyana wakhe. Into ayivuyeleyo yena kukukhuthalela konyana wakhe umsebenzi wendlu. Ubepheka unkabi abashiye abantu bemunc'iintupha benethemba lokuphinda baphakelwe kuba besazi ukuba 15  
lopha ngokuphindwa. Unkab'amalanga ebezityabeka iindonga zezindlu zakowabo atyabuke izandla, anikine intloko obukeleyo esithi, 'utyaphile umfo kaXhalabile abekho!'

Ifuthe likanina limenze uMntuyedwa wabaqhela kakhulu abantu basetyhini kangangokuba neendaba zakhe beziyondelelana nezabo. Ubungafika 20  
enabe zwii elwalweni ecaleni komlambo esidl'imbadu neentombi zelali, unge ungamrhiwula, umthwebule engathandanga, uye kumlahla ecaleni kothango.

- 6.2.1 Xela esi senzo ebesoloko elungele ukusenza uMaDosini ngokwakwesi sicutshulwa. (2)
- 6.2.2 Kwakutheni ukuze uMntuyedwa akhulele ekhusini elingunina? (2)
- 6.2.3 Isixelela ntoni ngoMntuyedwa inkcaza ekrwelelwe umgca ngaphantsi kwisicutshulwa? (2)
- 6.2.4 Ngqina ukuba uMadosini akamkhuthazanga uMntuyedwa ukuba aqhelane nemisebenzi eyaziwa njengeyamakhwenkwe. (2)

- 6.2.5 Kwezi ziganeko zilandelayo chonga zibeZIBINI eziqhubeka kwinqanaba lokuyondela/lokujiya kwebali:
- A UMntuyedwa ubizelwa imbizo ngamakhwenkwe elali yaseSikhobeni.
  - B UMadosini uyalela uMntuyedwa ukuba emke eSikhobeni.
  - C UMntuyedwa ufika kwilali yaseMyameni.
  - D UNtandoyakhe uxelela uMaDosini isigqibo sembizo yakomkhulu. (2)
- 6.2.6 (a) Xela indawo eliqhubeka kuyo ibali ngokwakwesi sicutshulwa. (1)
- (b) Le ndawo incedise njani ekutshabalaliseni umnqweno kaMaDosini wokuba unyana wakhe amkeleke eluntwini? (2)
- 6.2.7 Ngubani umlinganiswa esingqamene naye isihloko seli bali? (1)
- 6.2.8 Kudluliswa myalezo mni kweli bali? Xhasa impendulo yakho.
- Cwangcisa impendulo yakho ngolu hlobo:
- (a) Umyalezo odluliswa libali. (1)
  - (b) Xhasa mpendulo oyinike ku-(a). (2)

[35]

**AMANQAKU ECANDELO C: 35**

**ICANDELO D: ISIHOBE**

Kweli candelo, kukho imibuzo esetwe kule mihobe ilandelayo:

- 'Intambanane' nguZ Mtumane
- 'Ingcwaba' nguS Maputi

Phendula YONKE imibuzo ekwimibongo oyifundileyo.

**UMBUZO 7: IVAMNA BAFAZI BOLUSU – S Maputi nabanye**

Funda ezi zicatshulwa zilandelayo zithatyathwe kule mihobe uze uphendule imibuzo esetwe kwisicatshulwa ngasinye. Amanqaku awabelwe umbuzo asisikhokelo sobude obulindelekileyo bempendulo.

**QAPHELA:** Phendula imibuzo esetwe kuyo yomiBINi imibongo oyifundileyo, oko kukuthi UMBUZO 7.1 noMBUZO 7.2

7.1 Funda esi sicutshulwa sombongo silandelayo uze uphendule imibuzo.

**INTAMBANANE – Z Mtumane**

- 1 Ntinga ntakandini!
- 2 Nditsho kuwe ke ntambanane,
- 3 Intak'entingel'esibhakabhakeni,
- 4 Iwujongel'ezantsi won' umhlaba,
- 5 Inge ngathi iyawuhlola.
- 6 Ndikhe ndikubon'undanda,
- 7 Maxa wamb'ud'utyityimbe,
- 8 Ube ngath'uyadlisela,
- 9 Kwabo bakubukeleyo.
- 10 Zange ndayibon'intak'ekwaz'ukum'emoyeni,
- 11 Ime ndawonye yenz'amadliselo,
- 12 Kodwa mhla ndabona wena ntambanane,
- 13 Ndabona umhlola wemihlola,
- 14 Umi ndawonye esibhakabhakeni,
- 15 Uxhents'utyityimba phezulu phaya.
- 16 Wena wenz'imihlali kwabany'abantu,
- 17 Bathi besakukubon'usenza le mihlola,
- 18 Bangabi nakho ukuzibamba,
- 19 Baqhwabe izandla besombelela wena,
- 20 Bade bakulinganise xa utyityimbayo,
- 21 Baxhentse kube buhlung'amaqatha,
- 22 Zingashiyeki nazo izithende,
- 23 Ngenxa yakho ntambananendini.

- 24 Kodwa uyafana nothekwane,  
 25 Nangon'umhle nje ukwambi,  
 26 Azonwabi iinkukhu nguwe,  
 27 Zisakukubona ziyadandatheka,  
 28 Ngenxa yobo bubi bakho.  
 29 Uyawagqib'amantshontsho azo,  
 30 Ungafika ebaleka,  
 31 De atyhobeke nasematyholweni,  
 32 Kuba ebone wena ntambanane.
- 33 Kaloku awunalusini kuwo,  
 34 Uzifaka zeyele iinzipho,  
 35 Nakwiyukwana lentshontshwana eli,  
 36 Uhambe umke nalo,  
 37 Ukuya lee ezintabeni,  
 38 Ulenze isidlo sakho.
- 39 Yiyo le nto ungemhle kakhulu,  
 40 Kubantu abafuye iinkukhu,  
 41 Kub'uyabaphazamisa wena  
 42 Kwimizamo yabo yokuvelisa,  
 43 Batsho bahlwempuzeke ke bona  
 44 Ngenxa yakho ntambananendini.  
 45 Sala kakuhle ntambanane.

7.1.1 Khetha impendulo echanekileyo kwizibiyeli.

Isixhobo sesandi esibhalwe ngqindilili kwisitanza soku-1 sibizwa ngokuba (lundindwano/yimfanozandi).

(1)

7.1.2 Tolika igama elikrwelelwe umgca ngaphantsi kulo mqolo ungezantsi.

'Inge ngathi iyawuhlola.'

(2)

7.1.3 Khetha impendulo ibeNYE echanekileyo kwezi zingezantsi.

Isafobe esikulo mqolo; 'Nangon' umhle nje ukwambi,' ...

- A lufaniso.
- B lubaxo.
- C luchasaniso.
- D lugxininiso.

(1)

- 7.1.4 Xela lo mhlola wemihlola ithetha ngawo imbongi kulo mqolo ungezantsi wesitanga sesi-3 salo mbongo.  
'Ndabona umhlola wemihlola' (2)
- 7.1.5 Chonga igama kwisitanga sesi-5 elithetha ukukhathazeka kakhulu. (1)
- 7.1.6 Xela umfanekiso-ngqondweni oziswa ngumqolo okrwelelwe umgca ngaphantsi kulo mbongo. (1)
- 7.1.7 Kukwenza uzive njani ngeli ntshontsho kubhekiswa kulo kwisitanga sesi-6 ukubanjwa kwalo ngeenzipho yintambanane? Xhasa impendulo yakho (2)
- 7.1.8 Uqaqambisa ntoni ngentambanane lo mqolo ungezantsi wesitanga sesi-6 salo mbongo?  
'Ulenze isidlo sakho.' (2)
- 7.1.9 Xela ukuba intambanane ikudala njani ukuhlwempuzeka kwabantu abafuye iinkuku ngokomhlathi wesi-7. (2)
- 7.1.10 Sahluka njani isitanga sesi-4 kwesesi-7 ngokomongo? (2)
- 7.1.11 Ingaba imbongi ngokwalo mbongo iyayithanda intambanane? Xhasa impendulo yakho. (2)

### KUNYE



7.2 Funda lo mbongo ulandelayo uze uphendule imibuzo.

**INGCWABA – S Maputi**

- 1 Simanga somngxuma, awuhluthi,
- 2 Umntu simgqibela ekhaba;
- 3 Emva kwethuba umhluthe;
- 4 Umphathele imbengwana ephanda;
- 5 Uncume, kaloku uhlobene nokufa;
- 6 Sele bemi ngemihlakulo besomba;
- 7 Ukhintsele usala nokuthufa.
- 8 Umhla, iveki, ngabanye behamba;
- 9 Ukhamisela emoneni, umumatha;
- 10 Puqa! Loo mkhaba unge ugcwele ufuthe.
- 11 Ezibhedlele, nasezindleleni uthungatha;
- 12 Kungantsuku zatywala uwuthe;
- 13 Akabethelwa nangu 'doh' umnini,
- 14 Emathunjini omhlaba **kwesakhe** isilili.

- 7.2.1 Xela ukuba kutheni imbongi isithi 'simanga somngxuma' ingcwaba kulo mbongo? (1)
- 7.2.2 Nika isithethantonye segama, 'ingcwaba'. (1)
- 7.2.3 Ngcingani eziswa yile miqolo mibini ilandelayo yalo mbongo?
- 'Umntu simgqibela ekhaba'
- 'Emva kwethuba umhluthe' (2)
- 7.2.4 Qwalasela lo mqolo ungezantsi walo mbongo.
- 'Uncume, kaloku uhlobene nokufa'
- (a) Nika intsingiselo yegama, 'ukuhlobana.' (1)
- (b) Cacisa ukuba lihlobana njani ingcwaba nokufa. (2)
- 7.2.5 Caphula umqolo othetha ukuba abantu bafa mihla yonke. (2)
- 7.2.6 Liwakhangelaphi amaxhoba ingcwaba ngokwalo mbongo? Xela iindawo zibeMBINI. (2)
- 7.2.7 Nika umfanekiso-ntelekelelo oziswa ligama elikrwelelwe umgca ngaphantsi kulo mbongo. (2)
- 7.2.8 Libhekisa kubani igama, 'kwesakhe', elibhalwe ngqindilili kulo mbongo? (1)
- 7.2.9 Ngqina ukuba imiqolo emi-2 yokugqibela yalo mbongo yikhaphulethi. (2)
- 7.2.10 Nika umxholo walo mbongo. (2)

**[35]**

**AMANQAKU ECANDELO D: 35**  
**AMANQAKU EWONKE 70**